

解州全志目錄 本州

卷之一

星野

沿革

疆域 形勝 舖通附

卷之二

山川 水利 渠堰附

風俗

物產

卷之三

城池 村堡 坊里 橋梁附

壇廟

公署

卷之四

學校 書院 義學附

田賦 丁徭 雜課 鹽引附

戶口

倉儲

兵防

卷之五

職官

官績

卷之六

選舉

卷之七

選舉

附薦辟

貢生

例仕

例貢

武秩

封廕

卷之八

人物

卷之九

人物

卷之十

列女

卷之十一

古蹟 坊表 寺觀 林墓附

祥異

卷之十二

奏疏

卷之十三

藝文

卷之十四

藝文

卷之十五

藝文

卷之十六

藝文

卷之十七

藝文

卷之十八

雜志

解州全志卷之十四

本州

藝文

重修州治記

明楊瑩

解之爲地著名於晉而成邑於秦至五代後漢始改爲州統五縣環地幾六百里古公侯之封國不是過也宏治丁巳程侯由汾守解開篆之後視其公廨穿漏圯傾且規度卑隘不足以壯觀瞻而施政治今歲乃謀修建之凡法所宜有者若治廳儀門幕宇吏舍之類開擴基址加置楹礎一轍維新材木伐其在山金帛贖於在刑人力役乎在官者不三浹旬而厥功告成民不勞擾由

是四望宏敞突然高拔而煥然改觀矣解學諸廣文多  
侯之功而司訓曾子正不遠百里來蒲介大學生口致  
用屬言記之以余知侯者仰惟聖天子臨御天下挈土  
地人民而付與守令焉者豈私於守令哉守令之設制  
度必有廨宇豈徒飾爲觀美之具哉其職務之專豈止  
於督賦稅聽訟獄而已哉且州之所處有統有屬凡問  
於上刑於下者或一夫失乎情愆於理將大者求其罪  
小者效其尤豈不有以撓吾之治哉是爲守令者不易  
治其職而州守之職其尤難治也歟爲治有道也道得  
於心而施於政則其治不難矣其要在修身也安民也

忠君也舉三者之要而盡之爲治未有易於此者矣然  
事之接續無窮而紛拏易惑時之遷變無定而從違難  
拘君子之治本諸身必直其氣不屈於勢主義以制事  
因時而求中則其接續者易應紛拏者易解故所與從  
之必民之所好也所與違之必民之所惡也夫以好惡  
爲從違而未嘗與之拂是其仁愛之實在朝廷不得親  
布之而守令以分惠之必安乎下以忠於上而思挈與  
之重爲不負視出治之所爲無愧則愛民之道得矣亦  
何有於本末之偏舉而統屬之相戾哉若侯其能致治  
者侯名觀字□□寧陽人發身科目始正教蒲庠旣尹

廣靈守汾陽其文章道誼之高剛介幹能之實爲山右稱首蓋有本者宜受超格之陟今之解凡俗有不便事有不治者若學校城池之屬奸弊强暴之類次第興除之亦無異於廣汾故凡三月而內臺出按山西者以羔幣樽酒相勞之日操持無玷撫字有方則爲學能立其體爲政能達於用其事可書也而別有傳記具載諸廣文以俟修建之大治理之善欲同垂於久遠俾後人之爲解者視之不惟知侯之興作而解衙得繼葺於無窮必皆思侯之功績而解民得受惠於無窮未必不由今日之所啟也故寓以治道而樂爲記之云時宏治十一

年戊午冬十月之吉

重修解州城記

韓文

正德庚午秋古汲李公文敏字惟聰陞守解凡政有裨  
補者輒急於舉行士勸於習民安於業未幾畿甸草寇  
竊發延蔓至數千餘人縱橫其保及山東河南等郡縣  
搶殺攻圍燬官民屋宇越明年勢滋熾由景德而南轉  
掠山西徑趨翼城相距本郡僅百里許公乃繕城浚濠  
募力士設武備嚴號令明賞罰與民守之以死自誓盜  
聞遂北遁不敢犯而一郡保無他虞一日公召士大夫  
並耆宿語之曰邦本莫先於民而衛民莫先於城嘗考

諸郡志州城創自先元迄今逾二百年矣風雨飄損雉堞傾圯且規制低薄不堪保障邇者羣盜壓境聞風遠避吾人得脫鋒鏑之難也實僥倖耳釋今不圖安保將來於是白理嵯御史羅山胡公仲善案行所屬安邑等五縣各集工夫並力修築石伐於山木採於林甓陶於野其或料物弗給者侯自爲處分仍推本郡舉人間輔監生侯相董其役而侯實朝夕督之用是納度有方程勸有法民不知出財之費工不憚服役之勞直若子趨父事者然甫兩月工卽告成傳所謂以佚道使民雖勞不怨者信不誣也夫城周匝廣袤仍舊而壯偉森嚴實

數倍於舊立石用垂不朽竊惟大易於萃以戒不虞而重門擊柝之制固有取諸豫蓋居安慮危思患預防以爲弭奸禦暴計耳噫凡我郡邑之民其尙思公之所以興舉之由及士大夫耆宿立石之意且俾後人享其利於無窮者亦不敢忘其所自云

重修州學記

韓文

解爲平陽支郡學廟原坐郡治之東南隅創自有元及今二百年矣其原建大成殿洎明倫堂齋號公廨倉庾宰牲等房歷年滋久風雨催殘傾圯前之爲守者間嘗修葺一二然廢墜者尙多正德四年冬河南李侯文敏

由鄉進士先知兗之魚臺擢守是郡下車首謁先聖廟  
乃偕同知彭君佑判官王君禮各捐俸金爲倡百計料  
理鳩工庀材陶甃輦石踰月工成且完且美殊爲改觀  
由是肄業有齋燕息有所飲饌有庖儲粟有庾貯器有  
庫仍建號房二十楹外樹儒林坊射圃亭噫李侯之用  
心亦已勤矣經始於正德五年十月落成於次年八月  
司訓項君鎮詣予徵文夫興學固有司之責而育材實  
師儒之任彼教化陵夷必思有以明之風俗頽靡必思  
有以正之人才彫弊必思有以養之誠如是則賢才之  
興顓顓焉濟濟焉出而効用於時以鳴太平之盛光輝

前後以媲美於古人者未必無其人也豈但科目賓興榮耀一時而已哉

重修二忠祠記

呂 枏

二忠祠祀漢關雲長張翼德也劉先主元德與之桃園結義起兵討賊興復漢室志雖未成義則已立曰二忠云其祠則解人義官王君寬之祖名德者捐地以建其子登州府經歷守春捐貲重修者也然雲長解之常平里人志殲二賊威震華夏某嘗編次其行事曰義勇集已傳行矣惟翼德雖號萬人敵然如破魏將張郃以安巴西功在益州多神於蜀解人合祀或者疑焉曰翼德

雲長之友也蓋皆切磋琢磨以求成乎忠者也固不可以地之遠邇名之大小別是故微翼德雲長之道或不能若是之大微雲長翼德之勇或不能若是之正微二忠之烈先主之業漢室之延或不能若是之顯且久王氏合而祀之其有見乎此不可以勸不義而戒不忠耶祠周皆磚甃有坊在其前石爲柱費皆經府所自出經府有子曰大學生光祖嘗師予於解梁書院以修明周程張朱之學比予改官南京又泛黃河涉大江事予於鷺峰東所其歸也以是請曰吾父祖之志也則不可以莫之存耳祠落成在嘉靖四年之夏

常平里重修武安王廟記

徐祚

漢壽亭侯諡壯繆追封顯靈義勇武安英濟王解州人也州在漢時稱解梁縣隸蒲州統屬河東郡今仍之第郡改曰道而府別平陽云距州東二十里爲常平下馮村王故里也父老相傳廟卽王舊居有塔屹立襲稱塔下爲井王初避難出亡時其父母沉葬於內後人因爲起塔以表之惜史傳失記郡志無徵塔上嵌片石知在金大定十七年本莊舍人王興重修廡下列斷碑知入國朝一修於成化丙申再修於嘉靖癸未繼修於庚寅皆鄉民私葺官不與知焉憶余於乙未歲叨登進士第

卽夢謁一宮宇彤庭宏敞檜栢蒼蔥覩王端冕坐殿上  
旣而除知夏縣夏爲解之屬邑余以事入解趨謁王祠  
宛然夢境心甚異之以爲奇兆尋丁外艱還服闋補知  
萊之掖縣入登烏臺出守青郡俄謫西江之寧州前後  
凡十八年乃轉知解州始知前夢之示端兆於斯不獨  
形宰夏之徵而已也視篆往來經常平祇謁王祠乃知  
祠舊在塔前嘉靖初巡按侍御王公秀豎石爲坊榜曰  
關王故里後改廟南向前面中條山後倚鹺池抱靈吞  
秀於義尤當巡鹺侍御尙公維持發公帑金以倡侍御  
宋公儀望繼有所助而前解守張侯習判官王子大用